



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :



Tir Yimyim



tiryimyim@aolima



tir yimyim

TAPAK 8



Japan PM Fumio Kishida-i September ita mapa toktsütsü



Cole Palmer-i Chelsea den tenangzüktepba yanglushi

VOL. XXI ISSUE NO. 303 (ADOK 303) DIMAPUR YANGTEPNÜ (THURSDAY) LUROI (AUGUST) 15, 2024 ₹ 5.00

Framework Agreement (FA) ajanga Naga nunger temeten agizük; NSCN-IM

Asüngba Ao

Dimapur, August 14, 2024 (TYO):

Indo-Naga yimten olemtep nung Framework Agreement (FA) sign asüba ya mapa tulu ka liasü kechiyong küm 70 tema rarayonga arur iba ajanga Naga nunger temeten agizük ta NSCN-IM general secretary Th. Muivah-i ashi.

Framework Agreement nung telok ana tsüngda yimjung nung alitsü ta shia lir aser iba tetezü India aser Nagalim tsüngda yimjung nung alitsüba ashir. Iba ya küm 10 mesüra 50 tashi aotsü akok ta Muivah-i ashi.

Bodbarü Hebron camp nung 78 buba Naga Independence benjung amondang Deputy Ato Kilonser V S Atem-i Th. Muivah osang zünga metetdaksü.

India-i telok ana timi jembitepba nungi pilara aser Naga nunger yimtenren tsütsü tia tamajung ka ajurudaksüra, ibaji

Framework Agreement nung nangzüktepba alema inyakba ta züngshitsü ta NSCN-IM-i ashi.

Framework Agreement ya Naga nunger atema taküm aser tasüba lir. Asenoki iba nung lateta ama meinyakra, alimai asenok menütsütsü. Tarutsü putuia tanü Naga nungeri otsütsü aketba Framework Agreement nung latetba ama meinyakba atema asenok dang tasüngdangba alitsü, ta NSCN-IM-isa metetdaksüogo.

India sorkar aser NSCN-IM tsüngda August 3, 2015 nü Framework Agreement nung sign sütep aser iba atema sorkari Prime Minister Narendra Modi nem tenüngsang agütsüogo. Ajisüaka kümtem süia arudang Prime Minister-i jembiba ama meinyaker aser iba ajanga pai Naga yimten tebilemetsü atema süoki ia mebilemba sayur ta parnokisa ashi.

Oboula nunger ama longjemdi, temulung lemtepedi: Ino. Mhombemo Tsanglao

Dimapur, August 14, 2024 (TYO): NSCN/GPRN-i CFSB Office, Padumpukhuri, Dimapur nung 78 buba Naga Independence Day mongogo.

Iba sentong nung i tongti tesemdangjerji Kilo Kilonser, NSCN/GPRN Ino. Mhombemo Tsanglao liasü aser pai Naga national flag sala.

Asen pungmangtem aser taginübatem ataloktsü atema Naga nunger longjemtsüla. Asen oboula nungeri timten tekangshi jenti ajuruaka Naga political movement nungi masetshii tasü itta noktak, ta Ino. Mhombemo-i ashi.

Tangar tashitem ajanga tai maketba Naga nunger reshikangshiaka aser asüngdangya kecha mesüi Naga lima arrtsü balala lemsajaka asen oboula nungeri tayongzükbatem kokteta noktak aser tsükchirtem anema rara. Parnoki kodaser iba amai inyaktet ta süra parnok

tsüngda telongjem aser temulung lemtepedi liasü ta paisa ashi.

Tanü Naga loktilibai oboula nunger tsüngsü sülen manidaksüteter kechiyong tangar tashitem ajanga Naga nunger tsüngda telongjem samatsüogo aser temulung melemtep adokdaksüogo. Iba ajanga asen loktiliba nung telemsa adokpet adoker, ta Ino. Mhombemo-isa ashi.

Memenu dang Naga nunger kati ka dak tai tongloksütepba aser temulung melemtepba anendi. Asenok ka kuma longjemdi aser temulung lemtepedi Naga nunger taginüba asoshi inyakdi ta paisa ayongzüker.

Iba sentong nung Kilo Secretary Uketo Chopphy-i tesentepertem pelaa agizük, Cabinet Secretary Ino. Inovi Naga-i President onük zünga metetdaksü aser Deputy Kilonser Ino. Atsu Yim-i anük tepela o jembi.

BASLT-i Moakaba Aier khukhua aitsür

Dimapur, August 14 (TYO): Mokochung district nung Longchem block kübok Akumen (Lirmen) nung alir Karlijang Aier'er jabaso Moakaba Aier-i August 10, 2024 nü Sarinyim Nokpu-B village nung tesempatsü aser tesempatsü mapa tamajung inyakba khukhua aitsür, ta Bendanglen Alir Saring Lanur Telongjem (BASLT)-i metetdaksüogo.

BASLT-i ozüng amertem dang iba ken o tekaraba nung bentetsü aser "rarest of the rare

case" ama züngshia ozüng tapet kübok temerenshi agütsütsü ajungshiogo.

Obendang shidak magütsü tashi tai tonglokja alisang Moakaba Aier nem bail magütsütsüla aser yamaji meinyakba ajanga tarutsü nung timtem adokra ketdangsürtem khuret asütsü ta BASLT-i sangdong ka nung ashi.

Ochi angatetba nübür ajungai iba inyakyim aitsütsüla aser timtem ajurur yaritsü ayongzüker, ta parnokisa ashi.

Naga Morung ajanga NPGs aser Naga loktiliba longjemtsü ayongzüker

Kohima, August 14, 2024 (TYO): 78 buba Naga Independence Day tenüng nung Naga Students' Federation (NSF)-i Kohima nung 'Naga Morung' takok ngua ayongzüka agiogo.

Naga political groups (NPGs) balala tsüngda mangatetep malitsü aser Naga nunger pei sasa ketdangsüa aotsü aser longjemtsü tangatetba nung NSF-i iba sentong ayonga agiogo.

Naga Morung omen ya 'Kuknalim' nung ajemdaker agi, tetezü nübertem asoshi takok lir aser lanurtem dang Naga putiotsü metetdaksütsü atema agi. Iba sentong nung kaketshir aser lanur 2700 tema aden.

"Naga nungeri kodanga instrument of Accession nung sign asüba magizük kechiyong ibaji agizükra asenok Indian union tashi kübok lila. Naga nungeri rara mesüra haihaura kecha mali dang Indian Union mesüra Burma nung aden" ta NSF president Medovi Rhi-i ashi.

Naga nunger indang putiotsü balakaji iba ya lir aser iba putiotsü

ajanga asenok balaka liyonga aotsü inyakba nung tashi agütsür, ta pai ashi.

"January 10, 1929 nü Naga Club-i Naga nunger tenüng nung Simon Commission dangi shidi ka zülü. Iba shidi nung British nungeri India toktsür ora Naga nunger balaka yujang ta ashi. August 14, 1947 nü Naga National Council lenisüba kübok Naga nungeri nüjiso anguba sangoktsü. India nunger den anogo ka jelia Naga nunger nüjiso angu. 1951 nung Naga lima ajanga nung plebiscite agi aser iba ajanga nüjiso sangdongba pusema nungit" ta Medovi Rhi-isa ashi.

Iba mapang Naga National movement tanishirtemi Naga lima India kübok medendaksütsü atema rara. Ajisüaka India aser Burma nung adentsüsa aküm, ta paisa ashi.

Tanü asen tensa reprandangra Naga loktiliba lemsar lir. Asenok Kedahges aser Ato Kilonser 26 lir. Iba ya anentsüla aser asen tsükchirtemi asenok tsüngda telemsa adokdaksütsü merangba nungi

jenbua alitsüla ta Rhi-isa ashi.

Naga movement indang osang tiyazü prokshiba nung asenoki mamangtsüla. Asenoki Naga movement jungjunga angatetsü merangtsüla aser Naga nungeri bendanga agütsüba, timtemba aser kechisarena inyakbatem metetsü merangtsüla ta paisa ayongzüker.

"East Naga, west Naga, North Naga, South Naga mesüra Central Naga ta kecha mali. Asenok ka nisung ka dang aser linük ka dang lir. Alimai agizükba Naga lima atema NSF-ia rarayonga arur" ta Rhi-isa ashi.

"Naga Nationalism tenüng amer NPGs balala adokba ajanga asen Naga lima tia raksatsüogo. Nenoki inyakba mapa ya 'Nagalim for Christ' atema lir asü? Telok balalai Naga National movement tenüng amba ya Naga lanurtem aser kaketshirtemi magizük. Anungji NPGs ajak longjemtsüla aser Tsüngremi agütsüba Naga lima temeten atema külemi inyaktsü ayongzüker" ta paisa ashi.

"Hon Putu" nung oboula nunger ama inyakdi: Gen. Niki Sumi

Dimapur, August 14, 2024 (TYO): Iba anogo nung asen oboula nunger "Hon Putu" bilemteter shirnoki Tsüngremi agütsüba shisatsü amshia Independence sangoktsü ta NSCN/GPRN President Gen. Niki Sumi (Retd.)-i Independence Day onük jembidang ashi.

Parnoki bendanger tashitem nungi asen lima nüjiso angutsü tangatetba nung aser Khrista atema Naga Lima ka ama liyonga

aotsü atema nüjiso sangoktsü ta pai ashi.

"Hon Putu ajanga inyakba mapatem ama asenoki küm nung khen dang masü saka anogoshia linük balaka ama benjungteptsüla. Asenoki oboula nunger dang nung agizükba putiotsü aser yimten senmang nungi pilaa atema temulung raksar. Iba ajanga Naga National movement nung tetsükdaksü ajuruba dang masü saka asenok rongnung telemsa tali adokogo" ta Gen.

Niki Sumi-isa ashi.

Naga nunger ajak longjemter asenoki Nüjiso anguba tejakleni bener aotsü mapang ka tanü ajuru lir. Naga lennirtem aser shisashirtemi Naga nunger mesüra India ajangzüksü ta shisadanger ang ola adoktsü ayongzüker, ta paisa ashi.

Naga nungeri yimtenren taginüba atongtsü atema NSCN/GPRN-i meranga inyaktsü renema lir ta Gen. Niki-isa metetdaksü.

"Framework Agreement" aser "Agreed Position" na ya "Shillong Accord" den kecha balakabo masü amai angur: Dr. Toshi Echa

Sashimeren Jamir

Mokochung, 14th August (TYO): Naga nüchiso asoshi noktakba (Naga national movement) asen shi, azü aser teret nung alibaji kecha agia aitoktsütsü makok. India nungeri Naga nüchiso tia raksaja Naga nunger ajemreptsü asoshi Naga nunger tepsetba, rishikangshibaji kodanga Naga nungeri amatoktsü makok. Iba o ya Dr. Toshi Echa-i Khensa Peace Camp, Yimyu Compound nung FGN/NNC Ao Region pur 78 buba Nagaland Independence Day 14th August, 2024 nü amungdang metetdaksü.

Naga nüchiso nülaksü asür Osemjujang (Dibuia), Marnungtet (Ungma) aser Sümakchang (Mokochung), par aseme 2nd Feb 1965 iba tesem nung noktaker Naga nüchiso yimden telatet nülaksü India Foreign Secretary, Gundivia aser Member of Parliament on Foreign Affairs tsüngdang nülak

asong. Iba nülaksü o Dalle Namu, Peace Mission Secretary ajanga meyip. Iba anogo Col. Aomeri (Japu) Commandant aser Capt. Senka (Longmisa) 2nd-in-command liasü. Tanü iba nülaksü otem taküm lir, ta Dr. Toshi Echa shiba NNC Ao Region nung Advisor lir, pai metetdaksü.

Naga nüchiso takutsüngsen (revolution) ya senso temeten asoshi shi, azü aser teret nung mungter taküm bendanga agüja noktakba lir. Asen sobaliba, abensüoshi, sobusolemba, achiajem, tzü mopung, taküm yimya nung India nunger den saku masü. Yimlitem melentepa aor, putu melentepa aor saka yimli nüchiso memelenshir, ta paisa kuli kar dena agütsü.

Paisa Naga nüchiso asoshi noktakyonga arudang alima otsüren nung mamatoktsüba kar lemsatetpang, 13th century Ahom kini Kachari yimli matsüngtokdang, Naga nunger

aser Kachari yimli yanglur Brahmaputra lenten lima yimli yanglur küm 600 lia arudang, Naga nüchiso yimdenyimli nung kecha timtem makai aru. Ajisür 1824 nungi Burmese yimaker arua Ahom yimli laodaksü. Saka Naga nüchiso asoshi yimli nung timtem mali asü.

1842-1850 Governor Gen. Lord Dalhousie aliba mapang mezüngbuba alima ozüng ka Naga nunger sobaliba aser yimdenyimli nung mejangjungtsü sangdong (Non Interference Policy in Naga Hills). Aji saka, British yimsütsüba Naga limai tanem tanemi aita mangatetep adoka 1834-1879 küm 45 ben raratepa arur, 27th March 1880 nung "No War" (meraratsü) yimjung tenangzüktep British sorkar meyonger Brig. General Nation aser Pelhou Dolie Mezoma nung nangzüktep. Ibai Naga nüchiso tamendakdak nükmen lir, ta pai ashi.

(Maneni tapak 2 nung...)

ARaser Nagaland Police nati Tiranga Path Yatra ayongzük

Dimapur, Luroi/August 14 (TYO): HQ IGAR (N) kübok Assam Rifles aser Nagaland Police lungjemer Har Ghar Tiranga campaign nung shilem ka ama August 14, 2024 nü Dimapur nung Tiranga Path Yatra ayongzüka liasü.

Dimapur nung aliba nüburtsem tsüngta nüchiso aser telungjem tanüla benjongtsü aser National Flag indang awareness agüja nüchiso ngur küm 78 ajungba temaitsü nüburtsemi Tricolour asongtsü ajungmesoa iba yatra ya ayongzüka liasü.

Iba rally ya Police Headquarters, Dimapur nungi Commissioner of Police, Dimapur aser Commandant Assam Rifles ajanga tenzüksü, kong Assam Rifles aser Nagaland Police nungi ketdangsür 30 dak tema dena liasü.

Iba sentong nung Assam Rifles, Nagaland Police, NCC Cadets, Dimapur Government College, Vidya Bhawan Higher Secondary School, No 1 Air Squadron NCC nungi kaketshirtem, Railway High School nungi

kaketshirtem aser Dimapur nüburtsem ajak senteper nisung 1800 shi shilem agia liasü.

Iba sentong nung shilem agirtemi linük nisan amer lenmang nung jaja liasü, aser iba mapang parnoki Railway Station, City Tower, Khermahal, Chakesang Colony, Hongkong Market amala tongtipang tesemtem ajanga jaja aser linük nisan meter 150 talang bener jaja.

Iba rally ya Super Market nung tembanga shilem agirtem süngo jemdakja liasü.

Naga nungeri India nunger temzüng aser yimsüsübaji kodanga magizüksü. Ramkhating

Mokokchung, August / Luroi 14(TYO): Mangmetong, Longkhum, Alichen aser Satsü yim pezü nung aliba Naga linük tenzük tejenpurtemi (Ex.National Worker) ayongzüka Naga Nüchiso Sangdongba Anogo sentong ka Mangmetong yimtak Senden Riju nung ayongzüka kaogo.

Tanu iba sentong Naga linük tenzük tejenpurtemi kanga dang shisa kaa iba ama sentong ayongzüka akaba ajanga Naga nunger yimden otsü akaba shisang shisanga metetera tongti tesemdanger NSCN/GPRN.Steering Executive Member Maj.Gen.(Retd) Ramkhating-isa shi.

British nungeri India lima ramoka yimsü süaka Naga lima nungbo parnoki yimsü mesüteti aru, parnoki asenok nem tamangba yimsü tajung aser shisaliok dang agütsü, saka tanu India nungeribo asenok nem Hindu yimsü amangdaksütsü aser asenok lemsar lidaksütsü sentong dang atonger ta paisa ashi.

Naga nüchiso tenung nung telok(faction) 26 tashi kümogo, Naga yimden ken o angateta tenzüksü tangatetba nung masü

saka pei jenjang ajungtsü tangatetba nung adener aser inyaker telok aika lir,anungji nüburtsemi tanak temesüng bentettsü mapang tongja tongogo, Naga nungeri Naga senso tajung ka ama asen ayak shisang shisanga wazüka meyetetra shibai asen ayak wazüka yutsütsüta Ramkhating-isa ashi.

Maj. Gen. (Retd) Ramkhating-isa NSCN/GPRN-i India nunger temzüng aser yimsüsübaji kodanga magizüksü, India-i Naga nunger taginübaji mataloktsüra NSCN/GPRN-i injang prangpong bona arutsü terenemba lir ta metetdaksü.

Kasa sentong nung Wb.T.Sashi Imchen, Wb.Bangeryabang Longkhum, Wb.Wati Council Chairman Mangmetong,Wb.Wabangmeren Alichen,Satsü Council Chairman, Wb.C. Angang Council Chairman aser Wb.Imsümongba Pongen parnokia shilem agia jembiba den Mangmetong Baptist Arogo Arogo Youth Ministry ajanga telok ajungmesoa ken tajung ka aten aser tatem nung Rev.Lolen Pastor MBA ajanga sarasadema iba sentong tembang.

MPS Supongmeren Jamir-i Independence Daysalem abener

Dimapur, Luroi/August 14 (TYO): Asen linük nüchiso ngur küm 78 ajungba Independence Day külemi amungba mapang nüburtsem dangi salem abener, ta Member of Parliament (Lok Sabha), S Supongmeren Jamir-i sangdong ka ajanga ashi.

Zünger mezüngmai nüchiso asoshi rarar temi tasü ita, bendanga agütsür mangdang tulu yur asen linük tashi temeden aser telungjem atema raraba asenoki tushir.

India küm 78 liyonga arudang Science and Technology nungi Art and Culture tashi lenla balala nung takokba jenti lir aser lokti terenlok angur, aser asen linük indang tanüla ya asen diversity, timtem nungi tanaben nokdaktetba aser asenoki Democracy aser Justice asoshi manokshi nokdakba nung keta lir, ta MP Supongmeren-i ashi.

Asenoki tarutsü nung ranglokdang asen linük ya 'Freedom, Equality, Fraternity

and Secularism' nung amendaker kumtet angatetba wazüka ayutsü asenoki asendenshir züngzüktepti.

Asenok lungjemer tayongzükba ajak koktetsü aser India nunger mangdang aser tejangraba angutsüsa maneni linük yangerti. Iba Independence Day ya ajanga asenoki tarutsü nung asenok ajak atema jenjang tajungba nung rangloker inyaksü asoshi ajungmesotsü imlaa atar, ta Nagaland MP (Lok Sabha) ajangasa ashi.

"Framework Agreement" aser "Agreed Position" na ya "Shillong Accord" ... (TAPAK 1 NUNGI...)

29th May 1947 British Parliament-i yokba "Advisory Committee on Aboriginal Tribes" (Lisopur tenem kin) Kohima-i arudang, Naga yimdenyimli akhi ama dang alitsü ta zülur agütsübaji Naga nüchiso nüktang tulutiba ka lir. 27th - 29th June, 1947 NNC aser Assam Governor, Sir. Akbar Hydari Ali tsüngta '9th Point Agreement' ya Naga nüchiso temeten tulutiba, tang tashi India nunger lenirtemi ya merajemi lir, ta paisa ashi.

19th July 1947 nü India nunger nüchiso tebu, Mahatma Gandhi-i "nenoki India union nung medenüra, Naga nungerji nüchiso yimli nung balaka asütsüji nenok mulung", ta ashiba alima otsü nung teti alitsü. 14th Aug 1947 Naga nüchiso yimli anogo alima dang sangdongba aser UNO-i iba osang agizükba zülü tang tashi mesamai taküm lir, ta Dr. Toshi Echaisa metetdaksü.

9th Jan 1950 Delhi nung aser 27th Oct 1950 Shillong nung Dr. Rajandra Prased, President of India aser NNC delegates Naga nüchiso yimli asoshi akangkanga noktakba zülüji asen tetsüng ajemetdak lir, ta paisa ashi.

Alima ka kin nüchiso noknü aser raraba hadir mamshi telemetba agia yimdenyimli yanglubaji ajak dang tajungba Indo-Naga tsüngta nüchiso asoshi kin anapronglai mulungtep nung 16th May, 1951 Plebiscite agi. Ibai Naga nunger aser India nunger tsüngta nüchiso asoshi arla. Iba anogo India nungi Observer B.N. Malik, Director Intelligent aser osangbener The Hindustan Standard kulisür liasü. "Naga nunger asoshi alima tsüngdang kuli tulutibaji ibai lir", ta paisa shisem.

Alima kin ana nüchiso temeten indang jembidang, tongpang tulu



FGN/NNC Ao Region-i ayongzüka Khensa Peace Camp nung '78th Nagaland Independence Day' takok ngua mungter sentong nung tongti shilem agirtem den tadenertem külemi tangokba noksa nung angur. Mokokchung, 14th August, 2024

jazüka nüburtsem taküm, jenti lalua rarar tangatetep kadi arua kadi ka den yimjung bener arunür idangji cease-fire declare süa tongpang chitepba anener. Naga nunger aser India tongpang rara anentsü 6th Sept 1964 cease-fire amenokba jagi Naga nungerji India nunger masü ta kuli sayur. Asen Ao lima nunga iba anogo Longmisa yimdak Assam Chief Minister, B.P.Chalia arua Cease-Fire declare asü, ta ashi.

Cease-fire mapang 18th Feb, 1966 Indian Prime Minister, Indra Gandhi den Naga Federal govt. nungi Ato Kilonser - Kughato, NNC Vice President - Imkongmeren, Foreign Secretary - Isak Swu densema yimden olemtep tenzük. Aji oda, 9 ben tashi amendang Indian Prime Minister, Indra Gandhi-i Naga yimden telemetbaji India temzüng kübok dang agütsü, ta ashi. Iba osangji bener Vizol, Suiza aser Keviyali London-i A.Z Phizo dangi ao saka Phizo-i iba oji magizük nung Delhi nungi meyipa aru. Saka cease-fire camp ana - Chedema aser Khensa nung yanglu. Tanü Chedema Peace Camp kanga junga anepalua odar. Saka asenAo lima

Khensa Peace Camp yamai mejungi ayuba yagi Ao senso tajungtemi temulung magütsüba sayur, ta paisa sasaba olen ka lemsatep.

NAGA YIMDENYIMLI NUNG ASENOK SASA ASEN TETSÜNGATEMBA

India lima rangpen nung National Emergency June ita 1975 sangdong. Naga nüchiso asoshi noktakerkem pua tepokdak ayu. Talisa NNC Vice President, Imkongmeren aser Gen. Saniba pur temai anir adok. Ano lenir Vamazo, Huska, Dalle Namu aser Charlie Nowgong jail nung puoka ayu. NNC aser Federal Govt. nung tanishir pua alir rongnungi Naga underground tenüng nung India Govt. nungi Governor L.P Singh tenangzüktep ka koba dang "Shillong Accord" ta ajar, ibaji 11th Nov., 1975 zülutep. Saka A.Z Phizo-i magizük. Isak Swu, Foreign Secretary aser Th. Muivah, NNC General Secretary tenadia magizük. Tenadi anir NSCN tentet. Saka 1988 nung NSCN tsüngta mangatetep adoka ana paksa. Oda-oda lia arudang, telemsa adoka tangbo telok 25 shi kümogo. Naga nüchiso shi aser azü tangatetba nung inyaker mali,

kadia ka dak mulung malemer, kechiaser linük asoshi taküm tenlar masü saka sarusajia libalirotsü, kisüjensütsü aser rongsen benbuba telok, tebang o mapa na mesütepi alir dang kümogo, ta paisa tesasaba o kar lemsatep.

Naga National workers tsüngta kadi ka arishitepa azü tokshitep mapang 1990s zülü reprangra 1997 nung Aor lanur taküm 97 sama, 1998 nung lanur 23 sama aser 1999 nung Aor lanur 19 taküm sama. Kechiba telok balala rara nung küm asem tsüngta Aor lanur 139 taküm sama ta süra kadi ka arishitepba nungi tesama adokba lir, ta pai bushitetba kuli kar metetdaksü.

1955-1975 (20 years) tsüngta asen Aor 61 taküm tenla-a tsükchir den tongpang raradang nokinketer ama asü. T. Aliba Imti NNC nung mezüngbuba President liasü saka asenAor samanir sür 1959-1960 nung NNC t'arak adokdakja Naga Peoples Convention tentet. Ano 1970s nung asenokisa Naga Burma nung NNC pelepsa taküm jenti amajok nung sama. Naga Mothers' Association Aotsüri anir tentet saka

atsüngzüka atar, NSF Aori shilem tulu agia tentet saka mapang kabo asenok atsüngzükter liasü. ABAM asen Aor tentet tajungtiba nung asen sasa komo anakteter ama angur, ta paisa temulung shirangba o kar ashi.

"Framework Agreement" 3rd Aug., 2015 NSCN (IM) aser Govt. of India zülutep aser ano "Agreed Position" 17th Nov., 2017, 7 NNPGS Working Committee anaprongla ya telung miim zülubangluji shisadanga, 11" Nov., 1975 Shillong Accord den kecha balakabo masü amai angur. Kechiaser Agreement asemprongla India Union kübok inyakyim asütsü ama ajiteter, ta Dr. Toshi-isa lenla balala nungi asadanga jembiba. "Tang nungi danga asendenshir asenoki len jimia maotsüsa ochi nung Naga nüchiso asoshi tarutsü lanu asensor nem shisatsü peria amoktsüdi", ta paisa ayongzük.

Sentong tenzükba maodang tanep NNC AO Region President, Senli Imchen-i Naga National Flag atsükettsü. Sentong nung NNC President, Gen. Retd. Vivalie Metha-i yokba osang NNC Ao Region Advisor, Takoyaba-i zünga ashi. NNC Ao Region Court Chairman, Kikum Pongen iba sentong nung menden liasü. NNC Sub Region Ongpangkong President - Tongzük-i tarur pela-a agizük aser NNC Ao Region, Tatar Tinu-i melepzüng o lemsatep. Rev. K. Temjen Longchar-i Laishiba zünga temoatsü meshia sarasadem. Temenungratsüka tang teinyakdak pur den taoba mapang linük tenzükertem, temulungertem aser osangbenertem kar densema iba nüchiso anogo meraketa munga liasü.



PROGRAMME FOR CELEBRATION OF
78th INDEPENDENCE DAY 2024
AT NAGALAND CIVIL SECRETARIAT PLAZA, KOHIMA



0600 hrs : Hoisting of National Flag in all Government Offices, Institutions/ Public & Private Buildings.

0850 hrs : Review of Parade by DGP, Nagaland.

0900 hrs : 1. Hon'ble Chief Minister arrives, hoists the National Flag, takes Rashtriya Salute and inspects the Parade.

2. Address by the Hon'ble Chief Minister.

3. Presentation of Awards.

4. March Past :

Parade Contingents:

- | | |
|---|---|
| a. 13 Assam Rifles Bn. | k. NCC |
| b. 78 th Bn. CRPF | l. Bharat Scouts & Guides |
| c. 37 th Bn. BSF | m. G. Rio School |
| d. DEF, Kohima | n. Bethel Higher Secondary School |
| e. 4 th NAP Bn | o. Government High School PWD |
| f. 10 th NAP (IR) Bn. | p. 13 Assam Rifles Pipe Band |
| g. 15 th NAP (IR) Mahila Bn. | q. Nagaland Police PTS Brass Band |
| h. Manipur Police Contingent | r. Nagaland Police 15 th NAP (IR) Mahila Pipe Band |
| i. Ex-Servicemen | s. Nagaland Police Auxiliary Brass Band |
| j. Home Guards & Civil Defence & SDRF | |

Parade Commander : **Shri Akihito Sumi**, NPS
Dy. Commandant 1st NAP

Second-in-Command : **Kum. Mhalezhunuo Chielie**, NPS
DSP (Prob) attached CMS, PHQ

5. Launch of **Chief Minister's Universal Life Insurance Scheme (CMLIS)**

6. Entertainment:

- a. Patriotic Dance : "Chak De India" (Kohima Orphanage and Destitute Home)
b. Songs : i) "You Raise Me Up" (NSSA Music Club)
ii) "Vande Mataram" (Nagaland Madrigal Singers)

7. Cultural Presentation:

- | | |
|--|----------------------|
| a. Sakhabama Youth Organization | : (Angami Tribe) |
| b. Pfushon Zie | : (Rengma Tribe) |
| c. Surumi Cultural Society | : (Sumi Tribe) |
| d. Phusachodu Christian Youth Endeavour | : (Chakhesang Tribe) |
| e. Beru Cultural Troupe | : (Yimkhiung Tribe) |
| f. Mutaou Dombu Edou | : (Chang Tribe) |
| g. Mangmetong Cultural Club | : (Ao Tribe) |
| h. Tikhir Women Union Kohima Cultural Troupe | : (Tikhir Tribe) |

8. The National Anthem : Government School Choir,
Deptt. of School Education

9. Distribution of Sweets at the Parade Ground : Dobashis of DC Office, Kohima

1200 hrs : 1. **Governor's "At Home"** - By invitation

2. Visit Of Institutions By Charitable Organizations

- | | |
|---|-------------------------------------|
| a. Nagaland Adventure Club & Voluntary Blood Donors Association, Nagaland | : Cradle Ridge |
| b. Nagaland Contractor & Suppliers Union | : Tabitha Enabling Academy |
| c. Gorkha Public Panchayat, Kohima | : Leprosy Hospital, Nagabazar |
| d. Kerala Club, Kohima | : Old Age Home |
| e. Kohima Masjid Committee | : Cherry Blossom |
| f. Royal Club, Kohima | : Bright Morning Star, Periechiezie |
| g. Kohima Press Club | : District T.B. Hospital, Khuzama |
| h. Lions Club, Kohima | : State Mental Health Institute |
| i. Kohima Chamber of Commerce & Industry | : Kohima Orphanage & Destitute Home |
| j. Indian Red Cross Society, Nagaland State Branch | : District Jail |

**Evening Programme
at Nagaland Civil Secretariat Plaza**

1430 hrs : Exhibition Football Match,
DGP XI Vs NFA XI

1530 hrs : Prize Distribution.

1600 hrs : Band Display

- | |
|---|
| a. 13 Assam Rifles Pipe Band |
| b. Nagaland Police PTS Brass Band |
| c. Nagaland Police 15 th NAP (IR) Mahila Pipe Band |
| d. Nagaland Police Auxiliary Brass Band |

Beating of Retreat

The programme will be livestreamed at this YouTube link
<https://www.youtube.com/live/9Rm4pdVkr4g?feature=shared>

Telangana nung Rajya Sabha bypoll atema Congress-i Abhishek shim



New Delhi, Luroi/August 14 (Agencies): Telangana nung Rajya Sabha bypoll atema Congress-i Abhishek Manu Singhvi nominate süogo.

"Congress tir Mallikarjun Kharge-i, Telangana nungi Council of States atema bye-election asoshi Abhishek Manu Singhvi Congress candidate asütsü shimba agizükogo," ta Congress general secretary KC Venugopal-i sangdong ka ajanga metetdaksü.

Iba küm tetenzüklen party-i Himachal Pradesh nungi Singhvi shim saka Congress MLA kari cross-voting asüba ajanga parnoki BJP candidate Harsh Mahajan mekoki liasü.

Himachal Assembly nung Congress züngsem 40 lir aser parnok nem Independent candidate aseme teyari agütsüdar. Ajisüaka Congress MLA trok aser Independents MLA aseme BJP candidate nem vote agütsüba sülen candidate anapronglai vote 34 ngua liasü. Lots draw asüba sülen takoker sangdonga liasü.

K Keshava Rao-i mapa toksüba sülen Telangana nung Rajya Sabha menden ka asoshi bypoll agitsüsa kümogo. Rao-i

2013 küm Congress party toksü aser Telangana Rashtra Samithi (tang Bharath Rashtra Samithi) nung dena liasü.

Ajisüaka yimdenyimsüsur tejen ya taküm July ita ano Congress nung denogo. Telangana nung Congress-i takok anguba sülen pa party melen aser Rajya Sabha nungi anena liasü.

Election Commission of India (ECI)-i, taoba hopta state teku nung Rajya Sabha menden 12 atema bypolls agitsü sangdonga liasü.

Menden 12 rongnung menden 10, züngsemtem 2024 general elections nung Lok Sabha atema shimba sülen tazüng aküm. MP tem rongnung Piyush Goyal, Sarbananda Sonowal, Jyotiraditya Scindia, Deepender Hooda, Biplab Deb, KC Venugopal, aser Misa Bharti nunger densema lir.

Nominations file asütsü atema tatembangbuba anogoji August 21 asütsü aser nungdak dang süra election September 3 nü agitsü.

Telangana nung by-election Singhvi-i akoktsü imlar, kechiyong Telangana nung Congres pur züngsem timba lir.

J&K nung kiralongrar den khatepba mapang Army officer ka tepset

New Delhi, Luroi/August 14 (Agencies): Jammu and Kashmir kübok Doda nung kiralongrar den khatepba mapang kanga mejungi yiruba Army office ka süogo, ta army source kati metetdaksü.

Jammu kübok Doda tesem nung Bodhbarnü khatepba mapang kiralongrar pezü tepseter alitsü ta amanger aser captain, Deepak Singh kanga mejungi yirua liasü, ta ketdangsürtemi metetdaksü.

Shivgarh-Assar belt nung atsüka aliba bendanger kiralongrartem bushitetsü atema meita aoba sentong ka benoka inyaksangshiba mapang arem min ka nung sepaitem aser kiralongrartem khatep tenzuka liasü.

Khatepba tesem nung azü agi mezübanger aliba yangko pezü ngutetogo. M-4 carbines-a ka ana ngutetogo, ta ketdangsürtemisa shisem.

"Kiralongrartem ya Assar nung ayongküm ka nung atsüker liasü," ta ketdangsür kati ashi.

Security force aser kiralongrartem mapang tatsüka khatepba sülen kiralongrartem ya Udhampur district den

atonga aliba Patnitop anasa arem ka nungi Doda-i ai, ta parnoki ashi.

Ketdangsürtemi ashiba agi, Security force aser kiralongrartem Mongolbarnü nikongtsütsü 6 ako shia nung Udhampur nung chitepa liasü. Iba sülen ghonda tesadang ka lir khatep tenzük aser mapang tatsüka khatepa liasü aser sepaitemi iba tesem manger mesangwa tsüngda longbang.

Maneni anü adokba sülen kiralongrartem maneni bushia ao aser Bodhbar anepdang 7:30 ako shi nung maneni khatepa liasü, ta ketdangsürtemi ashi.

Taoba Jammu and Kashmir Chief Minister Mehbooba Mufti-i army office ka asüba osang angazüka asükhu lemsatepogo. "Doda nung tanü tatalokba ya tebang agi rasa ashitsü makoker, kong Captain Deepak Singh khatepba mapang tepsetogo.

Administration-i tensa junga lir ta shiaka J&K nung azütokshi lendong tanen maka ataloker aser tai maketba nisung aika taküm samar. Asür kinungertem den asükhu lemsateper," ta Mufti-i ashi.



TIR YIMYIM YIMOBILEM (EDITORIAL)

DIMAPUR YANGTEPNÜ, AUGUST (LUROI) 15, 2024

Tashimait-a Asadangtsüla

- Tangsen Lemtur

Küm 77 tejaklen India nunger nüchiso anguba mapang nung mezüngbuba Ato kilonser Jawaharlal Nehru-i, "Tanü asenoki ajangzükteba ya mera ka dang lir saka ano aika ajangzüksü atema maongka lir," ta jembia liasü. Atangji pai jembiba ama India nunger nüchiso ngur küm 77 tashi arudang India-i lenla aika nung alizüng aika tongtetogo. Ajisüaka tanü ama Independence Day anogomong amongdang lenla balala nung India-i ajangzüktebatem asadanga denji külemi tashimaitbatem-a asadangtsü nungdak. British nunger yimsüsüba talenba nungi India-i nüchiso angubaji alizüng tuluka tongtetba liasü, aser India-i nüchiso atema raraba otsü ajanga tangar-a aika ajungmesoa bendanger yimsüsüba nungi nüchiso nguogo. India nunger nüchiso anguba sülen lenirtemi mangdang tulu yur secular-democratic tangatetba nung linük temzüng renema liasü. Linük temzüng kübok sensotem nem pei tebilemba sadem-sadema jembitsü temeden aser tamanga yimsü temeden densema temeden aika agüja lir. 1947 küm India nunger nüchiso anguba mapang nung linük rongsenkettzüng jenjang kanga mejungi liasü, saka tesüiba küm aika Congress aser BJP sorkartem yimsüsüba kübok tanübo India ya alima nung rongsenkettzüng jenjang tekeraba ainba linük ka kümogo, ta alimai züngshir. Ajisüaka küm 70 tejaklen lenirtemi mangdang yur tenzükba ama masü, kechiyong tanübo India nung yimsü balala amangertem külemi tesünep nung meliteter, Khristantem aser Muslim nunger densema nütsüng ajema aliba nüburtambo pei yimsü-a sadoksadoka mebenshitetsüsa tensa ka nung lir. India nunger Independence Day 2024 atongtsü mapang ana nung lia US nung Khristan lenirtem aikati India-i tamanga yimsü temeden anema inyaker, anungji iba linük ya 'Countries of Particular Concern' List nung züngoktsüla ta US administration matsüngdang benokba ya ajanga India tenüngsa menüker. India nungbo yimsü, kin aser oshi nung ajemdaker nüburtambo mebandangi senso kati mashi state aser mashi tesem ka nung sadoksadoka litetsüsa yimteni inyaktetsüla; ibaji ajanga dang Rabindranath Tagore-i ashiba ama, India nunger pei lima nung tetsübu makai nümadangteta aser tejak tenteta nüchi mesüka alitsü. 1947 India nunger nüchiso anguba sülen terenlok tsütsü India kanga tejakleni ogo, ajisüaka India nunger nüchiso angudang Jawaharlal Nehru-i nangzükba ajak atangji ataloktsü atema yimsüsürtem teinyaktsü aika lir. Terenlok mapa aser rongsen kija agi nüburtambo melungsür malir, saka 'pei lima' ta bilema kecha tetsübu/tarendak makai sadoksadoka tesünep nung liner aika lir. India nunger lenirtemi tangar dangbo India linük ya kin balala, tamanga yimsü balala aser lokti temeyoktep aika külemi tesünep nung longjema litetba linük ka, ta nümatangtanga jembir, saka jembiba o mapa naji meputeper. Linük ka tejakleni aobaji terenlok aser rongsenkettzüng ajanga dang masadanger saka lenla aika nungi asadanger, anungji yimsüsürtemi rongsenkettzüng aser terenlok nung dang merangloki linük nung yimsü balala amangertem ajak tesünep nung tiptema litetsüsa inyaktetsüji kanga tongtibang asütsü.

OLEMSABANG

TOKLANG TENZÜKERI SEN KETDANGSÜBA

~ P.Renthy Jamir

Aor ajak Khristan yimsü amanger asünung Toklang tenzükerti ta ajaba tetezü memeteter shinga mali (parnok atema inti saru ka lateta lir nung koda) Iba ya mungdang aser arogo ajak nung kanga bulua jembiba o tasen ka lir (Tenüng tasen sarua tasen) Anungji iba ocet nung ya Aor dangi sen koma aru aser akhidang tamangertem mapang nung sen koda ketdangsüa amshi aser tanü toklang tenzükertemi sen koma ketdangsür angatetsü asoshi tera talangba nung rasa-a zülur.

SEN-Ao oshi nung nungja tetezü ratet aika jembir asenok kanga menurang tangar libaliru angu. Tangar alima kin balala pei pei sen amshir asenokbo maka tengunüsen asenalu onsara senarua senposenyaba agi sen ta aja ta teimbai ashir. Alima nung sen meyangludang yim O yim na kin o kina shitak shishilemba-a liasü. Oset O osetna chiyungtsü O chiyungtsü na ta melentepa shishitep, koba dang English agi Barter(Exchange) ta aja. Saka iba nung aiben timtem ajuru nung mezüngbuba Middle East nung 2000 B.C yin agi sen yanglu .Iba sülen 7th Century B.C China nung Bronze agi yanglu ano tanü asüng amshiba (modern coin) ya Lydia (Turkey) nung yanglu 650 B.C Anungji Yisu mapangbo sen tapu aika melentepa amshia liasü.Sen melenertem langbang mekeptoktsü ta shia angur.Ano tenla ki atema koba tax agütsütsü tzüym nung apuba angobang nungi agitet Mathi-17-27.Iba ya Greek nunger sen liasü.Aser nisung ka atema tenla ki tax two-drachma coin agütsür anungji Yisu aser Peter atema four-drachma coin angobang nungi agiteta agütsü.Ano Luk 20-24 nung adholi ka ta aliba yabo Roman nunger sen nungja (denarius) liasü.

Ano Iskariot Yihudai Yisu sen 30 yong ayok. (30 pieces of silver) saka pai iba sen ya Yihuda nungeri amshiba sen shekel nung agi ta ashir. Aser iba mapangji shekel ka jenjangji nübu 4 taah liasü.Anungji shekel 30=120 nübu taah liasü.Sen jenjangji Iskarioti meteta lir anungji pai atamata agibo Yisu mayoktsü . Pa Accountant cum cashier aser ochimashi nisung "saka pa auür aser pa madang sen kettsü alinung yangji kechi ayu aji bener ao Yohan 12-6. Yisu ayokba sen to dang masü telok sen ajak to bener ao.Iba mapang tashi ya senjang (Coin) dang liasü PAPER MONEY- Mapang talangka senjang (coin) amshia aru saka iba senjang yagi nüburtambo peria meyangluteter ano bener senzütsü tasak , anungji 9th Century A.D nung paper money ya China lima yanglua amshi. Anungji tejen lai mapang aser Yisu alima nung alidang tashi nungbo taribi ta sen ta senpak ta tatsük ta poisa ta ja-a aru. Süra asen Ao limai sen ya koda aru aser tang koba jenjang nung sen ya ketdangasür khen shisadangdi. Asen Aor sen makayonga Chungliyimti lima alidang nungi tangar den shishilemba-a aru, tongtibangsa Koridang alidang Maibang tzümar den shishi , kechiyong metsü(salt) yabo akhidang nungichiaaru,aser Aolima nungmetsümaka. Ano metsü yabo takar sensaker ajak kasa achiba chiyungtsü lir. Takara tali machir sensakera madoksa machir ta asübaji ya dang lir. Iba mapang kishi kinar aser tzümar den shishitepba ya sen bener oa shishi masü, saka kümpa , patio, liangmesen bener oa shishitep.Aor ainketer Nokpuliba otsü nunga kümpa O nashi na melentepa shishiba otsü jembir. Onok lanuwa mapang tashi tzüma limai shishitsü sen bener malu. Saka Patio, kümpa , pakti mersü süngmok mapo Liangmesen aser Naring yamala bener lua shishia metsü süngo Ngashi mojitzü melena bener atu. Ano aikati sen maliyonga Jabili amshi ta bilema alitsü. Saka Jabili yagi asen lima nungasüng meshishitet nung pi den shishitsü masü J.P.Mills kaket The Ao Nagas nung yamai zülua lir. Though, no longer used in trade .Shishilembaba nung mamshir .They no longer have any value as currency.Jabili nung sen ama jenjang maket. Ken nung meshimetsür Chiyungaka Jabili ka agüjang tetezü jenjang tila.Iba Jabili ya Elang kidong telok teji arju nunger zünger yamala nung bulua amshi süchir Nashi chirtemi amshi ano khen khenbo senchi menchi nunga Jabili paikaji züngjang ta amshi. Takar kidangbo Jabili ya aikasa yua liasü. Iba Jabili ya tapu ana Aori amshi ka jenjang tuluba ka tilaba ka Mongliba Jabili yin tajung agi atsüngba ka Tam Jabili yin pak tapu yin tamajung agi atsüngba .Anungji Mongliba Jabili ka nung Tam Jabili pungo liasü.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Impur nung Counselling Training agi



Impur, Luroi/August 14 (TYO): ABAM Church & Mission ministry ajanga ayonga toklanga tenzükker asoshi counselling training August 12-14, 2024, Impur nung kanga temoatsü nung agiogo.

Tenzükba wadang nung counselling ya kanga tongti shilem ka lir, kechiaser arogo nung tenzükba ya nisung taküm tia balala den tesendaktep kaa sensaksemba wadang lir.

Anogoshi meimchir tia balala nung sensaksem akatsü wadang asünung iba shilem ya junga agitetra tenzükba wadang nung terenlok aser takok lir, ta Rev. Dr. Mar Pongener, Executive Secretary, ABAM ajanga sangdong ka nung ashi.

Tanü nüburttem teyongyabaji kibok nung sensaksem tajung agia temulung süngzük angutsü ya lir. Anungji item nungdak

angateta iba sentong agir, ta ashi.

Iba sentong nung shisa len sayur, Dr. Tsüknungrenla Lkr Asso. Prof. CTC aser Rev. Dr. Moa Imsong DABA, liasü aser ajak agi Arogo 24 nungi tenzükertem 42 arua aden.

Tsüngremi tenzükertem maneni nüburttem aiki asoshi anisüngzük agütsütetba tenzükker süangma, ta sangdong ajangasa ashi.

Pakistan nung Khristan kibong ka dang nisung tepsetba ken o agientsü ajungshir

Lahore, Luroi/August 14 (Agencies): Pakistan nung Muslim nung kati tekolok meshidak tamanger tetsür ka pua bener oa tashiyim amshia shi nung medem aser la chioker ananü lir la yiruba zübu ajanga asü aser Muslim nungeri lar kibong dang ken o agientsü ajungshir, ta osang kar ajanga ashir.

Arishi küm 20 tain Salma Munir ya ita pongu pua yur June ita kumzük, ta All Pakistan Minorities Alliance Movement indang chief organizer Asif Khokhar-i ashi.

Muslim nunger Omer Khokhar, shiba dang Khatri ta ajar, pa ya Ajnianwala village, Sheikhpura District, Punjab Province nung Munir nunger anasa alir aser pai February ita la pua bener ao, ta Khokhar-i ashi.

Khatri-i Munir ya mesüzüksü temela ama ajitet, kechiaser la tekolok meshidak aser tepetzük tia anung aliba Khristan kibong ka nungi liasü, ta Khokhar-i ashi.

Khatri-i la pua bener Gujranwala yimti bushia ao aser yangji pai la dak aiben tashiyim amshia shi nung medem, ta Khokhar-i ashi. Iba sülen Khatri-i Munir ya takep ayokba tesem ka nung sen 50,000 (USD 179) agi ayok aser mapang tatsüka lir kiburi la Khatri nem meyipa agütsü aser ano pai Hafizabad yimti nung takep ayokba tesem ka dang sen 70,000 (USD 251) agi ayok, ta Khokhar-i ashi.

February ita Munir samadang lar kinunger temi police nem ken o ka zülüokdaksütsü merang, saka police ketdangsür temi la bushitsü tejangraba meliasü, ta Khokhar-i ashi.

June ita Munir teti ya Hafizabad nung mapa kar inyaki ao aser iba mapang la tenu ya dangar tetsür kar den rickshaw ka nung angu.

“Pai rickshaw ya anendaksü aser tenu ya kemzük, saka iba takep ayokba kibur ya jena otet. Munir teti-i la kidangi anur aru, saka la temang kanga mejungi raksar azü ayimba maneni liasü,” ta Khokhar-i ashi.

Lar kinunger temi la kanga meranga anepaludang, saka ananü dang lir la asü.

“La masü dang lar kinunger dang Khatri otsü aser pai la amshiba aser ayokba otsü ashi,” ta Khokhar-i Christian Daily International-Morning Star News dang ashi.

La tebu Munir Masih-i Khatri den oa jembi saka pai mapa tamajung meinyak ta ashi aser par kinungeri Salma nem miim chidakja südaksü ta tai tongloksü. Iba sülen parnoki yangji aliba Muslim nunger lenirtem dang teyari meshi saka takok mangu.

“Par tanüngba tanurtem lendongi aitsü tetsübo nung aser obendang angutsü teimla makai akum nung Masih ola madoki Salma ya June 25 nü arem,” ta Khokhar-i ashi.

Temulung ulushir Khatri-i anogo 20 sülen Salma Munir tenu Nisha Munir ya yimtung nung soita pua bener aotsü merang. Lai memulung aser iba mapang la teyi ama timtem ajurutsü ta pai amokmerena liasü, ta Khokhar-i ashi.

Nisha-i lar kinunger dang Khatri inyangshir indang ashi aser Masih-i par jala kumzüka ayutsü mechi Salma anema mapa tamajung inyakba atema Khatri merenshidaksütsüla ta mulungtet.

Masih-i Khokhar dang teyari meshi aser pa teyari nung Khatri anema First Information Report (FIR) ka benoktsü merang. Police temi mezüngbo tashi manga, ta Khokhar-i ashi.

Farooqabad police ajanga July 27 nü FIR ka zülüok aser Khristan provincial lawmaker Emmanuel Athar Julias dang iba kibong yaritsü mepishiba sülen Khatri ya apu.

Mapa tamajung inyak ta tai tonglokja alisang ya police custody nung liaka par kinunger aser tembar temi Munir Masih'er kinunger amokmerener aser ken o angatetteptsü ashir. Ken o majungba ajanga iba kibong kumzüka ayutsü kanga tongtipang, anungji onoki parnok ya danga leni anir ao, ta Khokhar-i ashi.

Forensic tests atema Salma Munir tasü mang ya taoba hopta leper nungi agitet aser iba osang ataa lir ta activist-i ashi.

“Tajemzükba tia nung aliba Khristan kibong nem Tsüngremi obendang agütsütsü imlaa lir, saka kasa mapang parnok kumzüka ayutsü mechi police aser sorkari nungi teyari nungdaker,” ta pai ashi.

Iba kibong ya kanga sensaker aser parnok ya farmhouse aser ki mürekba ajanga chiyonga alir.

“Parnok atsükshia senzütsüsa akumba ajanga senotsü agi kanga anünga kumogo. Onoki akok tashi parnok yaritsü meranger, saka ken o junga bushisüngdangtsü asoshi senotsü nungdaksü.”

Open Doors ajanga alima nung Khristanpur alitsü asoshi linük tamajungtiba 50 asadanga 2024 World Watch List nung Pakistan ya jenjang tenet buba nung lir.

ANOGO ABEN TSÜNGREM DEN

Taidok Meshiba

"Aser ozü menen dokangma; kechiaser onokia onok dang tai menaba ajak dang tai adoker" (Lk. 11:4)

Khristantemi parnoksa atidangtsü mulunga alitsüla. Puritan-tem sayutsüngir shirnoki nüburttem asoshi parnok mulungsentsü amsa, itemji züngshi; tanü ibaji mesükba sayutsüngirtem nungdaker. Asükümba shisa meliaka peisasa tendangba tazüokbaji tenüngdaksü, kechiaser asen temeshi kotaker Tebui alangzükja aliba tekümtetji mengui dang toktsütsü makok.

Asen menen indang asenoki meteta arudang asenoki temulung meyipba dangi arutsü akok, aser aseni ozüng raksaba asoshi taidok meshitsüla. Khristantemi pei aibelenji khuret küma bilemstsüla. Temenen ajanga maremsüktettsüsa tejashi adokdaksüba Tsüngrem dangi bener arubaji temeten mapa lir. Ochiba Khristan kati peisasa atidanga pei menen bushiteta iba den ajuruteptsübaji dang masü, saka pa temang ajanga tamajung inyakba ajak Tanela ajanga kangki nung südaksütsüla.

Nicaragua nung Khristanpur anema maneni inyaker

Managua, Luroi/August 14 (Agencies): Nicaraguan Tir Daniel Ortega aser tatong tir Rosario Murillo – Ortega kinungtsü – linük nung yimsüsüba mendeni aruba sülen Catholic Church den tesendaktep nung temelenshiba mali.

Mezüngbo Ortega aser Sandinista National Liberation Front (leftist guerrilla organization) yagi taoba tir Anastasio Somoza anema nokdaksü asoshi Catholic nunger dak metaloka liasü. Iba movement ya liberation theology kanga kera züina aoba nungi tenzük, koba ajanga Marxism aser Khristan yimsü meyoktepdaksü, ta The Public Discourse ajanga ashi.

Ortega-i dictator ama yimsü asüba anema 2018 küm longkak aitba sülen pai Catholic Church anema inyaker. Iba sülen tamangertem reshikangshia amshiba tali akumer ta Open Doors ajanga ashir.

Tawa Nicaraguan putir tenet apu aser Rome nung jenoka lir ta Vatican osang ajanga ashir. Bishop Rolando Alvarez-i anir aliba Diocese of Matagalpa nung National Police ajanga tamangba yimsü tsütsü lenirtem apuba rongnung item putirtem ya dena lir. Alvarez ya Ortega yimli anemer tejangja nübu ka lir aser pa küm tetenzüklen linük nungi jena ao, kechiaser pa küm 26 tepuokdak ayutsü obendang agüja lir.

Putirtem ya National Inter-Diocesan Seminary of Our Lady of Fátima nung puer

house arrest nung ayu ta ashir, aser iba bendang limai sülen jena ao.

Jena aortem rongnung Alvarez jena orr Diocese of Matagalpa anir Father René Vega Matamoros aser Edgard Sacasa dena liasü.

Pua alirtem nungya Father Marlon Velázquez, Father Jairo Pravia, Vicar Víctor Godoy of the Immaculate Conception of María de Sebáco Church, Matagalpa seminary indang rector Franciscan Friar Silvio José Romero, aser Father Harvin Tórrez nungertem dena lir.

Catholic Church aser Nicaraguan sorkar tsüngta mangatettep aliba mechi arogo lenirtem ya apu aser linük nungi aridok, aser iba ama mapa inyakba atema linük balalai aitsür.

Pontifical Mission Societies USA ajanga Nicaragua nung tamangertem aser talisa ministry balala nung lenirtem kumzüka alitsü, tasü aitsü asoshi sarasademtsütsü ayongzükker.

Republican telok nungi ozüng yanglur aikati US Tir Joe Biden indang administration dang Ortega yimsüsüba mechi Nicaragua nung tenokdangba agütsütsü ajungshir. Item rongnung Senators Rick Scott (R-Fla.), Ted Cruz (R-Texas), Katie Britt (R-Ala.), aser Tommy Tuberville (R-Ala.) nungertem dena lir.

U.S. Department of State ahabfa Nicaragua ya “country of particular concern” nung züngsemer.

**AO OSHI ANGAZÜKDAK:
TANÜ ANGAZÜKTSÜBA OJANG**



Taliba

(adj) sen agütsür bener aru (bought one)

* Kidang akaba osettem ajak taliba osettem lir.

Talidak

(n) aliba tesem (residence)

* Ni talidak ki ka yanglua lir.

OLONG PAITEP # 6895

	1			2	3			
4			5					6
					7			
	8							
	9		10			11		
					12			13
14								
					15			

TIPIEN

- 2. Sü jeplok - (4)
- 4. O agi merenshi - (5)
- 7. Ayongküm li - (5)
- 8. Chiyungtsü mapang süiadok - (4)
- 9. Tsüngrem den jembiba - (9)
- 12. Saklok - (4)
- 14. Samaba mebushitet - (5)
- 15. Mejanga onü - (5)
- 16. Tzü shiruru ka - (4)

LANGTSÜNGLEN

- 1. _____ i - (4)
- 3. Kasa masü - (6)
- 5. Nüchi masü - (5)
- 6. Tashi endok - (5)
- 9. Langtem - (5)
- 10. Anü malidang - (6)
- 11. _____ kibur - (5)
- 13. Tebur tembar tsüngda jatepba - (4)

OLONG PAITEP # 6894 TELANGZÜBA


TIPIEN :

- 1. Semtu, 3. Lepko, 5. Bilem,
- 8. Ulu, 10. Tsünpang,
- 11. Tesangwa, 13. Aoksa,
- 15. Putir, 16. Yipru.

LANGTSÜNGLEN :

- 1. Sayu, 2. Teb, 4. Kimong,
- 6. Lungkak, 7. Milak, 9. Zünga,
- 10. Temopu, 12. Walu, 14. Ali.

NAI-A YA METETTER MA



Kerala nung Perumpilavu Ansar English School nung kaketshirtem aser tesayurtem dena nisung 5,112-i "largest human image of a country's map" otsü yanglutetogo. 78 buba Indian Independence Day nüngtem nung parnoki iba sentong agi aser Talent Record Book nung züluokogo. Iba sentong nung tanur tsüraburtem aser non-teaching staff-ia shilem agi aser art teacher Noufan lenisüba kübok India map tasazük 20,500 square feet yangluteta liasü.

Manipur nung asür BSF sepai 2 nem gallantry medals agütsü

Imphal, August 14, 2024 (Agencies): Manipur nung kin o kin rara nung mapa inyakdang taküm samaba BSF sepai ana aser yirur ka nem Independence Day amongtsü anogo ka lia 'police medal for gallantry' agütsüogo.

Police Medal for Gallantry (PMG)



Parnok ya constable Narender Kumar aser constable Ranjit Yadav aser Assistant Commandant Ashok Kumar nung lir ta Union Home Ministry-i metetdaksüogo.

May 28, 2023 nü Tengenoupal district kübok Moreh jila nung

Narender Kumar aser Ashok Kumar nati taküm bendanga agütsü.

Meitei aser Kuki nung tsüngda raraba sülen BSF unit mapa lemszütsü aser idangji

Narender Kumar khaset aser Ashok Kumar yiru.

Narender Kumar-i inyakba mapa ajanga nisung taküm aser kiojen aika kümzüük.

163rd battalion nungi Ranjit Yadav ya yaküm June 6 nü Kakching district nung khaset. Pai tasü ita inyakba ajanga külem sepaitem taküm kümzüük.

BSF nung sepai lakh 2.65 lakh shi lir aser parnoki Pakistan o Bangladesh den India arrtsü anükba den internal security mapa balala inyaker.

BSF-i Tripura nung Bangladeshi nung 10 den India senso ka apu

Agartala, August 14, 2024 (Agencies): BSF aser Government Railway Police-i Tripura nung Tripura nung 10 aser parnok yarir India nung ka apu.

August 13 nü BSF anti-human trafficking unit & intelligence unit-i ozüing alema aruba Bangladesh nung aputsü atema mapa inyak ta BSF sangdong ka nung ashi.

West Tripura kübok Amtali aser Dukli nung BSF telok balala lemsar mita ao.

Anepdang 5:15 ako meta BSF telok den tanga agency temi Bangladeshi nung tetsür 4 apu. Parnok dang asüngdangya asüba sülen anepdang 8.00 ako meta ano Bangladeshi nung 6 den India

nung tiyongtsü nung mapa inyaker ka apu, ta BSF-isa metetdaksü.

Parnoki mezüngbi Bangladeshi nung masü ta shia taila Aadhar Cards sayu saka asüngdangya asü dang Bangladeshi nung ta nangzüük.

Guwahati okadaki

Bangladeshi nung ka merenshir

Assam nung Court of Additional Sessions Judge No. 1, Kamrup (M), Guwahati ajanga Bangladesh nung ka aitsüogo.

Iba nisung ya Kasem Ali lir aser pai Bangladesh nungi Tripura ajanga India-i aruba atema aitsü.

Iba atema pa küm 2 Rigorous Imprisonment (RI)

asütsü aser Rs 10,000 senchi menoktsü. Iba dakji alia pai ano aibelenra küm 1 Simple Imprisonment (SI) ayutsü ta okadaki temerenshi agütsüogo.

Sonapur PS nungi EGPD teloki Kasem Ali apu. June 12, 2021 nü pai Bangladesh nungi Tripura kübok Bodabasti Chowk ajanga India-i aru aser pa ket nung kulikaket kecha maliasü.

Iba tatalokba atema July 13, 2021 nü Sonapur PS nung FIR benok aser May 22, 2023 nü chargesheet agütsü.

Kasem Ali tepuokdak ayuba mapang tembangba sülen Guwahati Police-i pa Bangladesh-i anir aotsü ta okadakisa tetuyuba agütsüogo.

Assam nung September 3 nü Rajya Sabha election agütsü

Guwahati, August 14, 2024 (Agencies): Election Commission of India (ECI)-i Rajya Sabha elections agütsü osang sangdongogo aser iba nung Assam nung tongtipang menden ana dena lir.

Kamakhya Prasad Tasa aser

Sarbananda Sonowal nati Lok Sabha election nung takok anguba ajanga Rajya Sabha ana tazüing aküm.

Rajya Sabha election atema tanü nungi nominations tenzüker aser iba ya August 21 tashi aotsü. Iba sülen August 26 aser

27 anogotem tenüing meyipa agütsü akok.

September 3 nü Rajya Sabha election agütsü aser kasa anogo nunga results metetdaksütsü.

Tanü Returning Officer Rajeev Bhattacharya-i iba dak sendakba osang tejangja metetdaksüogo.

GOVERNMENT OF NAGALAND

DIRECTORATE OF WOMEN RESOURCE DEVELOPMENT

NAGALAND:: KOHIMA

Th NO.DWRD/DEV/TLI/APPT-1/2018(VOL.III)/466

Dated Kohima, the 9 Aug. 2024

ADVERTISEMENT

The Department of Women Resource Development invites eligible candidates for filling up of 1(one) post of Senior Project Coordinator with an Honorarium @ Rs.27,500/- p.m under Transformative Livelihood Intervention (TLI) Project.

- 1. Educational Qualification: Bachelor's Degree in any discipline from a Recognized University with minimum 3 years of work experience under any Government/ private livelihood project/programme.
- 2. Age limit: 30 years-45 years.
- 3. Preference will be given to candidates with experience in textiles & apparels designing & production.

Applications addressed to the Director, Women Resource Development in plain paper stating bio-data, 2 (two) passport size photos, self-attested copies of the relevant documents are to be submitted on or before 31st August, 2024.

Sd/-
VILONE SAKHRIE
Director.



GOVERNMENT OF NAGALAND

DIRECTORATE OF INFORMATION TECHNOLOGY AND COMMUNICATION

(Below Nagaland Secretariat)Thizama Road

Nagaland : Kohima 797001

DIT&C/Tenders/2022/

Dated Kohima, the 13th August, 2024

NOTICE INVITING TENDER

Online Bids are invited for Supply of IT Equipments from IT empanelled Firms under the Directorate of Information Technology & Communication.

The detailed tender documents can be viewed / downloaded from the following websites, from 14/08/2024 10:00 Hours (Server Time) to 28/08/2024, 14:00 Hours (Server Time):

- 1. <https://nagalandtenders.gov.in>
- 2. <https://nagaland.gov.in/>

The bids are to be submitted online through the e-Tendering Portal <https://nagalandtenders.gov.in>. If any Amendments/Corrigendum will be hosted on the above websites.

Sd/-
(Er. SABOU YASHU)
Director.

Iran dang Israel mamaktsü ayongzükba magizüker

Tehran, Luroi/August 14 (Agencies): Taoba ita Tehran nung Hamas lenir Ismail Haniyeh tepsetba atema Israel dak tayang mekepzüksü UK aser danga Western linük temi Iran dang ayongzükba magizüker.

Tensa tajungba kumdaktsütsü mechi linük balalai lenmang bushitepba mapang UK Ato Kilonser Keir Starmer-i Iran Tir Masoud Pezeshkian den Hombarnü telephone ajanga jembidang mitkari amaktsü amokmerenba anentsü ajungshia liasü.

Ajisüaka Pezeshkian-i mapa tamajung inyakba anendaktsütsü atema lenmangji tayang kepzüksü ya lir aser Iram temeden lir ta langzü, ta ashir.

Israel-i Haniyeh tepsetba nung dena lir ta shia mali, saka mitkartem tematiba jejang nung saksalema lir.

Iran mesüra par 'proxies' temi tan hopta kanga sashia amaktsü renemtar, ta US-i tekum dangtsü shiogo aser Israel yaritsü atema Middle East nung par mitkar aika yoka lir.

Lebanon nung Iran-i yariba tashi tait Hezbollah movement-ia Beirut nung Israel-i tayimtsü amshia amakdang par tanishir ka tepsetba atema tayang kepzüksü amokmerentar.

Hombar nikon dang UK, France aser Germany lenirtem lungjemer sangdong ka agütsüba nung Iran aser par tembartem dang region nung tensa tamajungba mekum daktsütsü asoshi mamaktsü ajungshia liasü.

"Yimjung aser tesunep asoshi iba maongka raksatsüsa inyakba atema par khuret asütsü," ta Sir Keir, Tir Emmanuel Macron aser Chancellor Olaf Schoklz

nungeri ashi. Iba sülen British ato kilonser-i telephone ajanga Iran indang tir dang indang-indanga iba tebilemstü lemsatepa liasü.

Meshidak asadantgeta lendong tulu ajurutsüsa lir aser süngjema kanga junga asadantsü mapangji tangya lir, ta Kier-i Pezeshkian dang ashi.

Pezeshkian-i Sir Kier dang Western linük temi Israel yariba ajanga maneni tashiyim amshitsü aser yimjung aser tesunep amokmerentsü ajungmesor ta ashi, ta Mongulbarneq Iranian news agency Irna ajanga ashi.

"Linük tesem kecha nunga rara adoktsü linük katia jangra malitsü ta Islamic Republic of Iran tangatetba Pezeshkian-i shiogo aser tashiyim amshir nem telangzüba tesashi agütsütsü ya linük tem temeden aser mapa tamajung anendaktsütsü lenmang lir ta ashi," ta Irna ajanga ashi.

London, Paris aser Berlin nungi ayongzükba magizüker, ta Iranian foreign ministry-ia ashi.

"Iba ama takhangba ya yimten tsütsü tazungla lir, koba international law indang tamendak dak aser ozüng den khenyongi mapeter," ta odongtar Nasser Kaanani-i ashi.

Israel mitkari Iran sangdong süoki ia agizüker ta Hombarnü shia liasü.

"Amaktsü aser defence tsütsü onok renema lir, aser sorkar totuyuba ama onoki inyaktsü," ta odongtar Rear Admiral Daniel Hagari-i osangbener dang ashi.

Israel sorkar indang odongtar kati Iran dang onok anema tashiyim amshir nem Israel-i taa

talang agütsütsü, ta ashi.

"Külem Israel nungeri bilemba ama kasa khuret aser teimla bener nokdaka lir. Tan hopta asütsü akok. Tangya Iran aser par proxy temi amaknung kechi akumtsü masadantgeter, saka asenok renema alitsüla," ta US National Security Council indang odongtar John Kirby-ia osangbener dang ashi.

Israel kumzuka ayutsü atema United States nokdaka aliba ama akokba mera ajunga agir ta sayutsü mechi Defence Secretary Lloyd Austin-i Middle East nung aircraft carrier strike group tanabuba aser ballistic missile submarine ka yoka lir.

Region nung tensa tajungba kumdaktsütsü asoshi Gaza nung ceasefire tezüngzüktep tasen ka yanglutsü aser Israel nunger pua alitem chioktsü ya lenmang tajungtiba lir ta US-i amanger aser Brehostibarnü nungi jembishinü tenzükshitsü ayongzükba liasü.

Israel-i ken o jembir telok ka yoktsü ta shiogo aser Hamas-i yangji shilem agitsü atema principal nung agreement ka nungdaker ta ashir.

Kechi tezüngzüktep agidir ita ka ser tesadang jakdang jembishinü amendakba nung ajemdaker alitsü aser ken o tasen metenzüktsü, ta Hamas-i Deobarnü ashi.

Hamas-i anir prangbong bena alir temi October 7 nü Israel amakdang nisung 1,200 shi tepseter nisung 251 pua bener Gaza-i ao.

Iba yongji Israel mitkari Gaza nung amak tenzuka tang iba rara ya adok. Israel-i tang tashinung Palestine nunger 39,920 dak tema tepsetogo, ta Gaza nung Hamas meyong health ministry ajanga ashir.

US-i Congo nem humanitarian teyari sen \$414 million agütsütsü

Washington, Luroi/August 14 (Agencies): U.S.-i Bodhbarnü ashiba agi, parnoki Democratic Republic of Congo nem humanitarian teyari USD million 414 agütsütsü, kong nisung million 25 dak tema iba amala teyari nungdaka lir.

United Nations Agencies for Food and Agriculture dangi US Ambassador Jeffrey Prescott-i Reuters dang ashiba agi, sen ya chiyongtsü, healthcare aser nutrition support, tejenokdak, tzü, sanitation aser hygiene amala agütsüba United Nations agencies aser teyari agütsüba telok balala nem telongjunga agütsütsü.

"Teyari agütsütsü aliba nung America nunger aluyimertemi alu nung tsünütetba chiyongtsütem indang indanga agütsütsü aliba densema lir," ta Prescott-i ashi.

Tang teyari agütsütsü aliba densema US-i taoba küm October ita nungi tang tashi

nung DRC nem teyari agüja aruba USD million 838 jungogo, ta Prescott-i ashi.

Congo army 2022 küm nungi M23 telungpurtem den rara arudar, aser linük anütoklen asendenshir raratepba ajanga nisung million 1.7 dak tema pei talidak ki toktsür jenshiogo aser tang tashi nung Congo nunger mepetmesü balala ajanga nisung million 7.2 pei talidak toktsür jenshiaogo, ta U.N-i asatetogo.

U.N. aid kati taküm DRC nem teyari USD billion 2.6 agütsütsü mepeshia liasü. Kasa mapang nung World Health Organization-ia taoba ita Congo nung tanur million ka dak tema acute malnutrition agi meneptsü ana nung lir ta tekümdangtsü metetdaktsüogo.

Prescott-i ashiba agi, US-i teyari agütsüba ajanga DRC nem teyari agütsütsü asoshi tanga linüktem ajungmesotsü imlar.

Maneni US-i health

assistance atema USD million 10 agütsütsü aser mpox vaccines 50,000 tenla agütsütsü ta Prescott-i ashi.

Mpox ya viral infection ka aser menatepa aoba tashidak ka lir. Tashidak ya yimya agi kanga tesashibo masü saka khen khenbo tasüba dena ajangshir.

Congo nung 2023 küm tetenzüklen nungi mpox tashidak pokteter lir aser nisung 27,000 shi dak iba tashidak potetogo aser nisung 1,100 dak tema süogo. Asürtem ya timba tanurtem lir.

Japan PM Fumio Kishida-i September ita mapa toktsütsü

Tokyo, Luroi/August 14 (Agencies): Japan Ato Kilonser Fumio Kishida-i, pa taruba ita party election nung Liberal Democratic Party (LDP) lenir mapa atema tanaben metoktepshtsü ta shiogo. Pai iba telemtetba agiba tetezü Ato Kilonser tasen ka shimtsü.

Bodhbarnü Tokyo nung osangbenertem den sensaksemba mapang Kishida-i ashiba agi, LDP lenitsü asoshi nisung tasen ka shimtsü mapang tongogo aser pai lenir shiba shimdir shimaka nongita yaritsü.

"Iba election nung nüburttem dang LDP melenshidar ta sayutsüla aser party ya LDP tasenba lir ta sayutsü nungdaker," ta Kishida-i osangbenertem dang ashi.

"Iba atema election sadem sadema ajak asoshi lapokja ochi nung agitsü nungdaker. LDP meleshiba sayutsü atema mezüngbuba jenjangi ni atsünginba ajanga sayutsü. Ni taruba tir election nung shilem magitsü," ta pai ashi.

Kishida-i ketdangsür tejentem dang pa election nung metokteptsü ta shiatokogo, ta national broadcaster NHK densema Japan nung media sangdong balala ajanga metetdaktsü.

Kishida ya 2021 küm September ita küm asem atema party tir asütsü shim aser iba sülen mapang tatsüka dang lir general election ka koka liasü.

Ajisüaka LDP yongtsü nung ochi mashi inyakyim temai adokba sülen pa indang approval ratings kanga ajema kümogo. LDP MP 80 dak tema ochi mashi ken o nung densema lir aser MP aser parnok nem teyari agütsür 10 tashi January ita aitsüogo.

"Pa joko mapang tatsüka mepetmesü nung arudar," ta Tokyo Temple University nung Japanese politics nung mongin Michael Cucek-i Reuters news agency dang ashi.

"Taoba Unification Church den LDP sendaktepa aliba ajanga nüburttemi Kishida dak temulung masür, koba Abe tepsetba sülen jangja aküm. Iba den ano senotsü ochi mashi ken o aser yen jenjang ajemba akümba ajanga osettsüt nung jenjang timba küma aoba ajanga nüburttem temulung masür," ta paisa shisem.

Party telolak mapa shibai agizükdir pa asoshi tinyaktsü

aika alitsü, kechiyong iba lenir yagi Ato Kilonser mapa abentsü.

Linük nung opposition party tongtiba Constitutional Democratic Party lenir Kenta Izumi-i ashiba agi, Kishida nem timtem agütsüba ken o ya ano mebenteti lir.

"Item tebilemstütem ano mebenteti lir," ta pai social media sabang X nung zülutsü.

Kishida ya taoba mapang foreign minister liasü. Kishida lenisüba nung Japan-i NATO standard koba GDP shilem ana lir, iba dak ajemdaker 2027 küm tashi nung defence nung sen anasü agi timba intoktsü telemtetba agia liasü.

Küm aika defence nung sen aika mintoki arur, Asia Pacific nung China tashi tali küma aoba mapang United States-i ajungshia senotsü talila intoktsü Japan-i telemtetba agiogo.

Kishida-i April ita US semdang aser iba mapang linük ana tsüngda tesendaktep tasen yanglushiba sangdonga liasü.

Kasa mapang nung July ita Japan aser Philippines na defence pact ka yangluogo aser iba ajanga linük anapronglai sepaitem yoktsü asoshi temelaba agütsür.

[See Regulation-15 (1)(a)]/16(3)
DEBTS RECOVERY TRIBUNAL
GUWAHATI Suwarna Bhawan, House No. 12, New Town Path, Near Hanuman Mandir, G.S. Road, Ulubari, Guwahati-781007 (Assam)
Case No.: OA/48/2020
 Sub-section (4) of section 19 of the Act, read with sub-rule (2A) of rule 5 of the Debt Recovery Tribunal (Procedure) Rules, 1993 kükok jaoker.
Exh. No.: 4393
AXIS BANK
VS
MESSERS NAGALAND POULTRY FEEDS
 To.
(1) MR L Talimeren
 Husband Of Late I Alemla Resident Of House No 300 United Colony Near Govt. Higher Secondary School Half Nagarjan Ps East Dimapur Nagaland Resident Of House No 300 United Colony Near Govt. Higher School Half Nagarjan Ps East Dimapur, Nagaland-797112
 OA/48/2020 ya Hon'ble Presiding Officer/Registrar matsüngdang **05/06/2024** nung zülüoka liasü. Sentsüh sen **3904466.26/-** (application den documents balala copy tem inoka lir) menoktsü atema Act, (OA) indang section 19(4) kükok iba Application atema Hon'ble Tribunal ajanga summons/notice agütsür.
 Act indang section 19 indang sub-section (4) nung aliba ama na defendants asünung item totuyuba ya agütsür:-
 (i) iba sangdong agütsür anogo 30 tsüngta parnoki meshizüka aliba anogo kechiba magütsütsüla;
 (ii) original application indang serial number 3A kükok applicant-i tejangja shia aliba ki o jen aser rongsen dak alaka danga ki o jen aser rongsen tejangja shitettsüla;
 (iii) ken o metembang tashi original application indang serial number 3A kükok shia aliba secured assets mesüra iba ama danga rongsen aser ki o jen mayoktsüla aser dangar nem magütsütsüla;
 (iv) Tribunal nungi temelaba magie original application indang serial 3A kükok shia aliba rongsen tem mayoktsü, dangar nem khen atema mamshidaktsütsü;
 (v) ordinary course of business nung secured assets mesüra danga assets aser ki o jen tem ayokba nungi aruba sen tem item rongsen mechi security interest aliba bank mesüra financial institutions temi amshiba account nung inoktsüla. Na tezüluba nung statement agütsütsü aser **Presiding Officer** matsüngdang **04/10/2024 anepdang 10:30** ako nung arua nokdaksü totuyuba agütsür aser yamaji meinyakra na meliaka ken o jembitsü aser telemtetba agitsü. **Iba 15/06/2024 anogo iba Tribunal tenung nung ni meyongnem aser seal agütsür.**
Issue summons. (Registrar)
Debts Recovery Tribunal GUWAHATI

OFFICE OF THE ASANGMA SHISASHIR TELONGJEM
 P.O. TULI - 798618
 MOKOKCHUNG : NAGALAND
KONANG TETUSHI AGÜTSÜR
 Toshimongla Jamir D/o Lt. Er. Temsünba Jamir ajanga St.Edmund's College, Shillong, NEHU nungi UG Examination nung Political Science Honours nung Top 3 jenjang ngutetba atema Asangma Student's Union (AST) ajanga tenüngsang agütsür.
 Tarutsü nunga la wadang nung takokba lidakjang aser anema aliba takum ka sudakjang ta Union-i moatsür.
MOALONG LEMTUR **WATISANGLA LONGKUMER**
President, AST. **General Secretary AST.**

Hockey India-i PR Sreejesh indang Jersey retire sütsüogo



Luroi/August 14, 2024 (Agencies): Paris Olympics nung otsüsüsüsa bronze medal anguba sülen Hockey India General Secretary Bhola Nath Singh-i, Indian keeper PR Sreejesh indang jersey number retire sütsütsü, aser pa Junior Hockey team head coach kümdaktsütsü ta shiogo.

Arishi küm 36 tain Sreejesh küm 18 tashi asaya aruba mapang Olympics ana atonga bronze medal nguogo.

India tebur hockey team-i Olympic anabuba atonga bronze medal nguogo, aser PR Sreejesh, shiba dang 'The Great Indian Wall of Indian hockey' pa takok tulu nung asaya nungi anendaktsüogo. Pa küm 18 tashi asayaba sülen asaya nungi anentsü atema telemtetba agiogo.

Paris Olympics nung Spain

den bronze medal atema asayaba mapang India captain Harmanpreet Singh-i (30th, 33rd minute) goal ana idakja parnoki asaya 2-1 agi koka liasü. Asaya nung Spain atema captain Marc Miralles-ia minute 18buba nung goal ka idaktsü.

India team-i takok tulu anguba sülen Hockey India-i, Sreejesh atema sentong ka ayongzüka katsü, kong Gen Sec-i Sreejesh career indang jembiba den pa nem tenüngsang agüja liasü.

Sreejesh dang pelaba temaitsü Hockey India-i Kerala nung asoba asayar nem ya trophy ka aser senpet sen lakh 25 agüja liasü.

Singh-isa, Sreejesh-i pa career tepeyong asema number 16 jersey senior jenjang nung shinga nema

mesemdaktsütsü ta sangdong aser keeper ya Indian Junior Hockey team coach asütsü shimba sangdonga liasü.

Sreejesh mezüng junior national team nungi 2004 küm asaya aser lanur asüba mapang Colombo nung South Asian Games asayaba mapang 2006 küm senior team nungi mezüng asaya liasü. Pa 2008 küm Junior Asia Cup akokba team nung densema liasü aser iba asayamung nung 'Best Goalkeeper award' angu.

Iba sülen pa Olympic Games (2012, 2016, 2020, aser 2024) pezü; World Cups (2010, 2014, 2018, aser 2023) pezü; Asian Games (2014, 2018, aser 2022) asem aser Commonwealth Games (2014, 2018, aser 2022) asem nung India tenüng nungi asayaogo.

Morne Morkel India team bowling coach kümogo



Luroi/August 14, 2024 (Agencies): Taoba mapang South Africa nunger pacer Morne Morkel, India tebur cricket team bowling coach asütsü shimogo, ta BCCI secretary Jay Shah-i Bodhbarnü metetdaktsüogo.

Morkel-i Paras Mhambrey melentsü aser pa lenisüba nung mezüngbuba Bangladesh den test asayatsü, koba Chennai nung September 19 nü nungi tenzüka asayatsü.

"Hau senior India tebur team bowling coach asütsü Morne Morkel shimogo," ta Jay Shah-i PTI dang ashi.

Morkel mapa September 1 nü nungi tenzüksü aser pa taruba ita tetenzükdang Bengaluru nung National

Cricket Academy-i arutsü. Morkel-i Duleep Trophy asayatem reprangtsü imlar.

Arishi küm 239 tain asayar ya taoba mapang Team India chief coach Gautam Gambhir den Lucknow Super Giants nung küm ana külemi inyakogo.

Gambhir indang support staff tem rongnung assistant coach Abhishek Nayar, Ryan Ten Doeschate aser fielding coach T Dilip nung densema lir. Morkel asaya aliba mapang South Africa tenüng nungi Test asaya 86, ODI 117 aser T20 44 nung asayaogo aser iba mapang pai international wicket 544 agia liasü.

Sources ajanga ashiba agi, Lakshmiathy Balaji aser R Vinay Kumar nunger jakdang

Gambhir-i tetuyuba agütsüba sülen Morkel shima liasü.

"Cricket Advisory Committee (CAC) tinyaktsüji head coach atema candidate tem interview asütsü liasü. Support staff shimtsüba dak sendakba nung Gambhir-i shiba aginer aji shimmer. Pa Morne den taoba mapang inyakogo aser pai pa bowling coach tajung ka ama züngshir," ta BCCI source kati PTI dang ashi.

Morkel shimtsü ta jangja akümba ajanga bowling coach atema Balaji aser Vinay na masadangi liasü.

Morkel, taoba mapang India nung aiben asayaogo aser pai Indian conditions kanga junga meteta lir.

Pa IPL nung inyakba mapang pai India nunger lanur fast bowler Mayank Yadav, Avesh Khan, aser Yash Thakur nunger ajak asadangtsü asoshi maongka nguogo.

Taoba IPL season ana nung Morkel, Mayank Yadav den inyakogo.

Morkel tatemsa Pakistan team indang coach liasü aser pai ODI World Cup tembangba sülen mapa tokja liasü.

Cole Palmer-i Chelsea den tenangzüktepba yanglushi

Luroi/August 14, 2024 (Agencies): England forward Cole Palmer-i Chelsea den tenangzüktepba ka yanglushiogo aser pa club nungi 2033 küm tashi asayatsü, ta Premier League club yagi Mongolbarnü sangdong ka ajanga metetdaktsü.

Arishi küm 22 tain asayar ya taoba küm September ita Manchester City nungi pound million 42.5 yong Chelsea nung oa aden aser tang iba London club nungi yagi 2033 küm June ita tashi asayatsü atema tenangzüktepba ka yangluogo.

Palmer ya taoba season Premier League nung asayar tajungtiba rongnung ka liasü. pai goal 22 idakja pa Manchester City nungi asayar Erling Haaland sülen tanabuba jenjang nung liasü. Kasa mapang nung pa England team Euro 2024 nung final tonga asayaba team nunga densema liasü aser Spain makokba asaya nung pai goal ka idakja mapang ka nungbo par team nem timla agüja liasü.

Euro Final nung goal 2-1 agi Spain makokba asaya nung arishi küm 22 tain Palmer ya substitute ama ia pai goal ka idaktsü.

Pa tang Chelsea nungi taruba küm teku asayatsü asoshi tenangzüktepba ka yangluogo, koba lanur asayartem den küm aika tenangzüktepba yanglua ayutsü atema club inyakyim nung shilem ka lir.

"Tenangzüktepba tasen ka yangluba atema ni kanga pelar," ta Cole-i Chelsea indang official website ajanga ashi.

"Ni mezüngbuba season aika ajangzükgogo aser iba club nung ano tajangshiba tajung aser takok tajung nguyonga aotsü imlar," ta paisa shisem.

Palmer ya Professional Footballers' Association player of the year atema nominate asüba asayar trok rongnung ka lir. Iba award akokertem ya August 20 nü Manchester nung sentong ka ayongzüka agiba mapang sangdongtsü.

ODI rankings: Rohit Sharma tanabuba jenjangi tuogo



(16buba) lir aser KL Rahul jenjang ka asepzüka lua tang 21buba nung lir.

India nunger Bowler tem rongnungi left-arm wrist-spinner Kuldeep Yadav maneni temaba jenjang nung lir. Pa South Africa nunger bowler Keshav Maharaja aser Australia nunger Josh Hazlewood aser Adam Zampa nunger sülen pezübuba nung lir.

Maneni bowler tem rongnung Jasprit Bumrah tibuba nung lir aser Mohammed Siraj jenjang pezü asepzükalua tekububa nung New Zealand nunger bowler Trent Boult den kasasa lir.

Mohammed Shami shiba tang ankle surgery agir National Cricket Academy, Bengaluru nung mongzüka lir pa 12buba nung lir.

Sri Lanka den asayamung nung India nunger asayartem rongnungi wicket timba agiba asayar Washington Sundar jenjang 10 tejakdangi tua tang 87buba nung lir.

All-rounders' list nung India nunger rongnungi Ravindra Jadeja temaba jenjang nung lir. Pa 16buba nung aser Hardik Pandya jenjang pezü asepzüka lua tang 26buba nung lir.

ODI team rankings nung India-i rating point 118 ngua temaba jenjang nung lir aser Australia (116) aser South Africa (112) na tanabuba aser tasembuba jenjang nung lir.

Luroi/August 14, 2024 (Agencies): Bodhbarnü sayaba ICC ODI batting rankings nung India captain Rohit Sharma tanabuba jenjangi tuogo. Tawa tembangba Sir Lanka den ODI asayamung nung kanga junga asayaba sülen pa tang tanabubai tuogo.

India-i iba asayamugn 0-2 agi mekoaka Rohit-i run 157 yanglu aser pa indang average 52.33 liasü. Pai asaya asem nung half-century ana yanglua liasü. Asayamung nung mezüngbuba asaya tie nung tembanga liasü.

India nunger rongnungi Shubman Gill tasembuba jenjangi asepzüka luogo aser Virat Kohli maneni pezübuba nung lir. Pakistan nunger asayar Babar Azam-i point 824 ngua pa maneni temaba jenjang nung lir aser pa sülen Rohit-i point 765 ngua lir.

India nunger rongnungi top 20 nung ano Shreyas Iyer-a

BILEMDANGANG

"Merangdangba kodang anenlir idangji tamakok angutsü."